

Iluarsiissutit

Siunnersuummut 02. juni 2026-imeersumut taarsiissut

(Naalakkersuisup akisussaaasuusup taaguutaanik allannguinerit aamma akissuteqaatip imarisaai tulleriinnerinik allanngineq aammalu naalisakkanik nassuiaaneq)

Ummannami Upernavimmilu eqqakkanik ikuallaavimmik pilersitsisoqarsinnaanera pillugu apequteqaat aallaavigalugu oqallisissiatut siunnersuut.

(Inatsisartunut ilaasortaq Aqqalu Jerimiassen, Atassut)

Akissuteqaat

(Avatangiisinut, Pinngortitamut, Nukissiutitut Ilisimatusarnermullu Naalakkersuisoq)

Naalakkersuisut oqallisissiamik siunnersuuteqartumut qujapput. Kommune-nit taakkuupput eqqagassalerinermut akisussaasut, eqqakkat katersornissaat peernissaallu akisussaaffigalugit.

Naalakkersuisut kommune-ni eqqakkanut suliaasaqarfimmi ilungersunartut ilisimavaat. Taamaammat Avatangiisinut Naalakkersuisup eqqagassat pillugit borgmester-it peqatigalugit ataatsimeeqatigiillat-taarnerit ingerlatilersimavaat. Ukkatarineqarpoq eqqakkanik ikuallanneqarsinnaasunik suliaqarnermi, inatsit assartuinnermilu qanoq kommune-t aaqqiissuteqarsinnaanerit.

Ataatsimoorussamik Naalakkersuisut Esani A/S-imi ikuallaaveqarnek innersuussutigalugulu taperserpaat. Ataatsimoorussamik ikuallaaveqarnermik aaqqiissuussamik pilersitsineq, ilaatigut eqqagassat pillugit Naalakkersuisut periusissiamik pilersaarusiarnut 2020-2031-mut anguniagassaannut ilaavoq. Ikuallaaviit marluk pilersinneqarnerisa siunertaraa pitsaasumik eqqagassanik passussinissaq, avatangiisinut peqqissutsimullu illersuisumik, aammalu eqqakkanik atoqqiinnikkut atorluarneqarnissaanut soorlu nukissiuteqarnermut isumalluutiginnissaat siunertaralugu.

Sisimiuni Nuummilu eqqakkanut ikuallaaviit nutaat marluk avatangiisinut tungatillugu Naalakkersuisut akuerinikuaat. Ikuallaavinnik nutaanik marlunnik pilersitsinissap, kiisalu assartuinnermut aaqqiissutissap tunuliaqutaraa dioxin-inik (dioxin ikuallaanermi pinngortarpoq, toqunartunik akulinnik uumassusilinnit ikumatitsingaanni pinngortartut, inuit uumasullu peqqissusiannut ajoqusiinnaasoq) kiisalu avatangiisinut peqqissutsimullu ajoqusiinnaasunik allanik aniatitsinermik annikillisaanissaq kissaatigineqarmat. Eqqakkanik ikuallaaviit avatangiisinut akuersissutigineqarnerani ilaatigut, teknikip pissarsiarineqarsinnaasup pitsaanerpaap BAT-ip (Best Available Technology) atorneqarnissaa tunngavigineqarpoq. Kommuni ikuallaavinnik nutaanik pilersitsiniaruni imaluunniit maannakkut ikuallaaviusut ingerla-tiinnassagunikkut, Sisimiuni Nuummilu ikuallaaviit nutaajusut avatangiisinut illersuinissamut piumasagaataasut assigisariaqarpaat. Tamanna aamma atuutinneqassaaq Ummannami Upernavimmilu eqqakkanik ikuallaavimmik pilersitsisoqassappat.

Eqqaaneqareersutut Avatangiisinut Naalakkersuisup tulleriiaarinnermini eqqagassat pillugit borgmester-it ataatsimeeqatigiillattaarneri aallartisarnikuuaa. Naalakkersuisut naatsorsuutigaat suleqatigiinneq ingerlanneqaannassasoq. Tamatuma saniatigut Naalakkersuisut Politikikkut Ataqtigiissaarisogatigiit ataatsimiilerpata eqqagassalerineq eqqartorneqarnissaa pilersaarutigaaq. Suliniutit aallartisarneqarput ataatsimoorluta eqqagassalerinerup avatangiisi-mut peqqissutsimullu isumannaatsumik isumagineqarnissaat qulakkeerniarlugu.

Taamatut oqaaseqarluta siunnersuutip oqallisigilluarneqarnissaa Naalakkersuisut qilanaaraat.